



## Hikmah yang Berguna

Daripada Abdullah bin Amru R.Anhuma, Rasulullah SAW bersabda:

مَا أَهْدَى الْمُرْءُ الْمُسْلِمُ لِأَخِيهِ هَدِيَّةً أَفْضَلَ مِنْ كَلِمَةٍ حِكْمَةٍ يَزِيدُهُ اللَّهُ بِهَا هُدًى، أَوْ  
 يُرْدُهُ عَنْ رَدِّي

**Maksudnya:** “Tiada seorang muslim itu menghadiahkan kepada saudaranya satu hadiah lebih baik daripada kalimah hikmah yang Allah tambahkan dengannya petunjuk hidayah atau menghalangnya daripada tempat yang rendah.”

Riwayat al-Baihaqi (1764) dan al-Dailami (6314). Hadis ini *daif*.  
 Lihat *Faidh al-Qadir* (5/430)

### Pedoman dan Iktibar Hadis

Antaranya:

1. Mengikut Imam Ibn Qudamah al-Maqdisi: “*Hikmah ialah gabungan antara ilmu dan amalan dengannya.*” Ibn Qutaibah menyatakan bahawa “*Tidaklah seseorang dinamakan hakim (bijaksana) sehingga disekalikan antara ilmu dan amalan.*” Hikmah juga dengan maksud “*rahsia atau maksud yang tersirat yang kadang-kadang di luar jangkauan batasan akal manusia.*” Justeru, ulama berkata: Kita disuruh mengkaji sebab, tetapi tidak disuruh mengkaji hikmah. Walaupun begitu, kadang-kadang hikmah dapat difahami dan diketahui walaupun tidak secara keseluruhannya.
2. Di dalam hadis menyebut, hikmah dengan maksud sunnah Rasulullah SAW. Walaupun begitu ada ulama menamakan kitab mereka dengan *Hikam* seperti Ibn Ataillah al-Sakandari bagi menggambarkan mutiara kata yang disusun, diambil daripada sumber al-Quran, al-Sunnah, sahabat dan ilham orang-orang

yang soleh di samping *tajribah al-Hayah* atau pengalaman kehidupan.

3. Sudah tentu manusia yang berbekalkan dengan hikmah selamat kehidupan bahkan kebahagiaan sentiasa bersamanya kerana dia dapat menukar segala suasana yang tidak baik dan kesedihan menjadi penawar dan kegembiraan.
4. Dr. Aidh al-Qarani melalui bukunya *La Tahzan* menyebut: Dengan ilmu kebahagiaan dan ketenteraman dapat dicapai. Hal ini disebabkan kerana ilmu dapat menyingkap kegelapan dan berjalan di atas sesuatu yang tersembunyi. Selain itu juga jiwa sendiri akan sangat tertarik pada perkara-perkara baru dan mempelajarinya sebagai persiapan hidup. Akhirnya dinukilkhan syair yang diucapkan oleh mufassir terkenal iaitu al-Zamakhsyari:

سَهْرِي لِتَقْيِحِ الْعُلُومِ الَّذِيْ ❁ مِنْ وَصْلِ غَانِيَةٍ وَطِيبِ عَنَاقِ  
 وَتَمَائِيلِ طَرَبًا لِحَلِّ عَوْيَصَةٍ ❁ أَشْهَى وَأَحْلَى مِنْ مُدَامَةِ سَاقِي  
 وَصَرِيرُ أَقْلَامِي عَلَى أَوْرَاقِهَا ❁ أَحْلَى مِنَ الدُّوكَاءِ وَالْعُشَاقِ  
 وَأَلَذُّ مِنْ نَقْرِ الْفَتَاهِ لِدُفَّهَا ❁ نَقْرِي لِأَلْقِي الرَّمْلَ عَنْ أَوْرَاقِي  
 يَا مَنْ يُحَاوِلُ بِالْأَمَانِي رُتْبَتِي ❁ كَمْ بَيْنَ مُسْتَغْلِ وَآخِرِ رَاقِي  
 أَبِيَّتْ سَهْرَانِ الدُّجَى وَتَبِيَّتْ ❁ نَوْمًا وَتَبَغِيْ بَعْدَ ذَاكَ لَحَاقِي

*Aku selalu berjaga malam demi kebaikan dalam ilmu,*

*Yang demikian itu lebih nikmat dari kekayaan dan pelukan,*

*Keinginanku menyelesaikan masalah yang rumit,*

*Lebih nikmat berbanding dengan titisan khamar;*

*Gerakan mata penaku atas lembaran kertas,*

*Lebih lazat rasanya daripada suara seorang gadis,*

*Lebih lazat daripada paluan gadis pada kom pang,*

*Paluanku untuk membentuk peta atas lembaran kertasku,*

*Hai orang yang mengharapkan dengan cita-cita kepada darjatku,*

*Berapa jarak antara bersungguh dan yang lain tingginya,*

*Adakah dengan sebab aku berjaga di tengah malam yang gelap,*

*Sedangkan kamu tidur bercita-cita lepas itu bersamaku.*

### Mutiara Hikmah

- ❖ **Pujangga berkata:** Ilmu itu akan membuat hati menjadi lapang, meluaskan pandangan, membuka cakerawala sehingga jiwa dapat keluar dari pelbagai keresahan, kegundahan dan kesedihan.
- ❖ **Pujangga berkata:** Barangsiapa memiliki adab yang banyak dan baik, perasaan yang sihat dan akhlak yang mulia, maka dia akan membuat dirinya dan orang lain berbahagia. Akan mendapat hati yang tenang dan keadaan jiwa yang sejuk.

### Kisah Teladan

Abu al-Faraj al-Jauzi menceritakan sebuah cerita dari Khalifah al-Mu'tasim: Sekumpulan orang yang sedang menaiki kapal telah mendengar suara ghaib yang bergema di lautan: Siapakah yang memberikan kepadaku wang 10 ribu dinar, maka aku akan mengajarinya sebuah kalimah, yang apabila dibaca oleh orang yang sedang tertimpa atau kesusahan, maka Allah akan menolong dan menghilangkan musibahnya serta kesusahannya: Maka salah seorang penumpang kapal berdiri dan berteriak: Wahai suara ghaib, aku akan berikanmu wang 10 ribu dinar, maka ajarkanlah aku tentang kalimah tersebut: Suara ghaib itupun menjawab: Lemparkanlah wang tersebut ke dalam laut. Suara ghaib tersebut berkata: Apabila engkau sedang ditimpa musibah atau kesusahan, maka bacalah:

وَمَنْ يَتَّقِ اللَّهَ يَجْعَلُ لَهُ مُنْجَحًا ﴿٢﴾ وَرِزْقًا مِّنْ حَيْثُ لَا يَحْتَسِبُ وَمَنْ يَتَوَكَّلْ عَلَى

اللَّهُ فَهُوَ حَسْبُهُ إِنَّ اللَّهَ بَنِيَ أَمْرِهِ قَدْ جَعَلَ اللَّهُ لِكُلِّ شَيْءٍ قَدْرًا

**Maksudnya:** Sesiapa yang bertakwa kepada Allah nescaya dia akan mengadakan baginya jalan keluar. Dan memberinya rezeki dari arah yang tidak disangka-sangkanya. Dan barang siapa yang bertawakal kepada Allah nescaya Allah akan mencukupkan (keperluan)nya. Sesungguhnya Allah melaksanakan urusan (yang dikehendaki)-Nya. Sesungguhnya Allah telah mengadakan ketentuan bagi tiap-tiap sesuatu.

(Surah al-Talaq: 2-3)

Lelaki penumpang kapal tadi kemudian bercerita: Demi Allah, setiap kali aku ditimpa musibah ataupun kesusahan, kemudian aku membaca dua ayat tersebut, maka Allah pasti menolongku dan menghilangkan kesusahan dan musibah yang aku alami. Segala puji bagi Allah yang telah mengajarkan kepada kami tentang bagaimana kami seharusnya berdoa dan memohon kepada-Nya sentiasa.